

**KAJIAN PROFIL KOPERASI DI NEGERI SARAWAK DAN
POTENSI UNTUK DIMAJUKAN DALAM PERNIAGAAN**

JAMILAH BINTI DIN

YUSMAN BIN YACOB

HAMIZAH BIN MOHD. NADZIR

SITI MAIMUNAH BINTI JERNI

SYARIFAH ROHAYA BINTI WAN IDRIS

MOHD HASWARDI BIN MORSHIDI

NGADI BIN ROBIN

OKTOBER 2008

RINGKASAN EKSEKUTIF

Gerakan koperasi di Negeri Sarawak telah bermula sejak tahun 1949 di bawah perundangan *Co-operative Societies Ordinance* 1949 Sarawak. Bermula dengan penumpuan dalam aktiviti tanaman sagu, gerakan koperasi di Negeri Sarawak telah turut melalui pelbagai fasa perkembangan dalam arus pembangunan negara khususnya di negeri Sarawak sehinggalah ke hari ini. Tahun 2006, menunjukkan Sarawak mempunyai koperasi dewasa sebanyak 295 buah. Daripada bilangan tersebut, koperasi telah di kategorikan sebagai koperasi aktif dan koperasi tidak aktif berasaskan kepada keupayaan koperasi mengadakan mesyuarat agung tahunan. Memandangkan dasar Kementerian Pembangunan Usahawan dan Koperasi (MeCD) adalah ke arah mengusahawankan koperasi, maka adalah penting kepada pihak-pihak berkepentingan untuk mengetahui gambaran sebenar koperasi aktif di negeri Sarawak dalam usaha menentukan potensi gerakan koperasi di negeri ini.

Kajian ini mempunyai tiga objektif iaitu mengenalpasti profil demografi koperasi, mengenalpasti profil demografi Pengerusi, Setiausaha dan Bendahari dan menilai potensi pertumbuhan koperasi. Kajian menggunakan data primer dan data nyata kewangan

tahunan tahun 2003, 2004, 2005 dan 2006 sebagai data skunder. Kajian juga mengambil pandangan ALK ini terhadap pengurusan dan pentadbiran koperasi daripada soal selidik yang disediakan. Ukuran Selang Likert digunakan dalam bahagian ini. Faktor pemboleh ubah "untung bersih" telah digunakan untuk mengklasifikasikan pertumbuhan koperasi kepada "*Prestasi Tinggi*" dan "*Prestasi Rendah*". Prestasi kewangan koperasi digunakan sebagai asas pengiraan. Pengukuran cara ini adalah merupakan satu kaedah lazim yang digunakan untuk pengukuran prestasi pertumbuhan sebuah organisasi perniagaan.

Kajian ini melibatkan 122 koperasi sebagai responden daripada 162 populasi koperasi dewasa aktif di seluruh sebelas (11) bahagian di negeri Sarawak. Dapatan kajian menunjukkan koperasi di negeri Sarawak adalah bersaiz kecil dari segi keanggotaan dan pemilikan aset. Ditahun 2006, 73.8 peratus koperasi mempunyai keanggotaan seramai 200 orang dan kurang. Bagi pemilikan aset, sebanyak 49.7 peratus koperasi memiliki aset RM 50000 dan ke bawah. Modal syer menunjukkan 43.4 peratus koperasi mempunyai jumlah modal syer dibawah RM 10000. Untung dalam kategori RM 2000 ke bawah telah dicapai oleh 52.5 peratus koperasi. 74.6 peratus koperasi direkodkan membuat pembayaran dividen berjumlah RM 2000 dan kurang. Terdapat 23 peratus koperasi tidak pernah menjalankan program pendidikan anggota. Didapati juga 36.6 peratus koperasi mempunyai sumber pembiayaan luar berbentuk geran kewangan atau tanah atau bangunan.

Penemuan mendapati seramai 77.1 peratus Pengerusi, 76.3 peratus Setiausaha dan 82 peratus Bendahari, mempunyai pendidikan sekolah menengah dan ke bawah. Ketiga-tiga penjawat jawatan tersebut, berumur melebihi 51 tahun iaitu Pengerusi 82.7 peratus, Setiausaha 48.4 peratus dan bendahari 59.1 peratus. Seramai diantara 56.6 peratus hingga 64.7 peratus ALK ini berpendapatan dibawah RM 1500 yang diperolehi daripada sumber pekerjaan hakiki mereka.

Kajian mendapati 41.8 peratus koperasi yang berada pada tahap "*Prestasi Tinggi*", mempunyai ciri-ciri yang strategik dalam aspek lokasi, keanggotaan yang ramai, aktiviti perniagaan yang pelbagai. Koperasi ditahap ini walau bagaimanapun masih rendah dalam

pemilikan asetnya dimana aset terkumpul kurang daripada RM50,000. Sebanyak 80.3 peratus Pengerusi koperasi kategori ini mempunyai pendidikan di peringkat Sijil Pelajaran Malaysia dan ke bawah. Mereka didapati kerap menghadiri kursus anjuran Angkasa dan MKM. Pengerusi koperasi kategori ini amat positif terhadap faktor-faktor pertumbuhan koperasi dan berpuashati dengan pencapaian koperasi mereka. Dapatan menunjukkan koperasi dalam tahap ini juga menghadapi kesukaran mendapatkan golongan pelapis, meningkatkan modal syer, tiada komitmen anggota, dan sukar mendapat golongan profesional yang mahu berkhidmat dengan sektor koperasi.

Kajian mendapati 58.2 peratus koperasi dikategorikan “***Prestasi Rendah***”. Koperasi dalam kategori juga mempunyai ciri-ciri yang strategik sepertimana koperasi berprestasi tinggi, namun masih terjadi perbezaan pencapaian. Kajian masa akan datang mungkin dapat mengenalpasti faktor-faktor lain yang mempengaruhi prestasi koperasi seperti ini. Kajian mendapati 76 peratus Pengerusi koperasi dalam kategori ini mempunyai pendidikan di peringkat Sijil Pelajaran Malaysia dan ke bawah dan hanya 51 peratus sahaja yang mengikuti kursus sama ada anjuran ANGKASA atau MKM sebanyak sekali. Kajian mendapati, tiada Pengerusi koperasi kategori ini mempunyai pendapatan melebihi RM 2000. Dalam aspek pandangan, 25 peratus ALK berpuashati dengan pencapaian koperasi mereka. Hasil kajian juga menunjukkan Pengerusi koperasi kategori berprestasi rendah berkongsi pendapat dengan Pengerusi koperasi berprestasi tinggi terutamanya kekangan mendapatkan golongan pemimpin pelapis, kesukaran meningkatkan modal syer, anggota yang tidak komited dengan koperasi, serta kesukaran mendapatkan golongan profesional untuk berkhidmat dengan koperasi.

Secara keseluruhan hasil kajian menunjukkan sebanyak 58.2 peratus koperasi di Sarawak adalah berprestasi rendah dan 41.8 peratus berprestasi tinggi. Bagi koperasi yang berprestasi rendah, prestasi kewangan adalah rendah dengan pemilikan aset yang rendah disamping kurang penekanan dalam aspek pendidikan dan latihan koperasi. Faktor pendapatan yang rendah diterima pengerusi daripada pekerjaan hakiki mereka dikenal pasti sebagai faktor halangan kepada peranan sukarela mereka dalam berkoperasi, ditambah dengan ketiadaan kakitangan, pengurusan koperasi adalah terbatas.

Berbanding dengan koperasi yang berprestasi tinggi pula, walaupun digambarkan rendah dalam pemilikan aset, mereka amat menekankan kepentingan faktor pendidikan dan latihan koperasi. Walaupun ALK hanya mempunyai pendidikan setakat SPM dan ke bawah, melalui kursus, mereka berjaya menaikkan prestasi koperasi yang diterajui.

Berdasarkan kepada profil koperasi boleh dirumuskan bahawa koperasi di negeri Sarawak adalah bersaiz kecil dari segi pemilikan aset, keuntungan, keanggotaan dan pembayaran dividen. Pengerusi, Setiausaha dan Bendahari kebanyakannya berumur melebihi 51 tahun dan memiliki tahap pendidikan SPM dan ke bawah. Golongan profesional yang berpendidikan tinggi masih tidak meminati koperasi.